

[www.docsriver.com](http://www.docsriver.com) 定制及广告服务 小飞鱼  
更多**广告合作及防失联联系方式**在电脑端打开链接  
<http://www.docsriver.com/shop.php?id=3665>



[www.docsriver.com](http://www.docsriver.com) 商家 本本书店  
内容不排斥 转载、转发、转卖 行为  
但请勿去除文件广告宣传页面

若发现去宣传页面转卖行为，后续广告将以上浮于页面形式添加

[www.docsriver.com](http://www.docsriver.com) 定制及广告服务 小飞鱼  
更多**广告合作及防失联联系方式**在电脑端打开链接  
<http://www.docsriver.com/shop.php?id=3665>



[www.docsriver.com](http://www.docsriver.com) 定制及广告服务 小飞鱼  
更多**广告合作及防失联联系方式**在电脑端打开链接  
<http://www.docsriver.com/shop.php?id=3665>



[www.docsriver.com](http://www.docsriver.com) 商家 本本书店  
内容不排斥 转载、转发、转卖 行为  
但请勿去除文件广告宣传页面

若发现去宣传页面转卖行为，后续广告将以上浮于页面形式添加

[www.docsriver.com](http://www.docsriver.com) 定制及广告服务 小飞鱼  
更多**广告合作及防失联联系方式**在电脑端打开链接  
<http://www.docsriver.com/shop.php?id=3665>



近代中國史料叢刊第五十四輯  
沈雲龍主編

包慎伯(世臣)先生年譜

胡韞玉輯

文海出版社  
印行

中  
光  
踏  
上  
積  
斷  
白

墨

墨

W-6209/02

民國十三年  
五月廿五日

[www.docsriver.com](http://www.docsriver.com) 定制及广告服务 小飞鱼  
更多**广告合作及防失联联系方式**在电脑端打开链接  
<http://www.docsriver.com/shop.php?id=3665>



[www.docsriver.com](http://www.docsriver.com) 商家 本本书店  
内容不排斥 转载、转发、转卖 行为  
但请勿去除文件宣传广告页面

若发现去宣传页面转卖行为，后续广告将以上浮于页面形式添加

[www.docsriver.com](http://www.docsriver.com) 定制及广告服务 小飞鱼  
更多**广告合作及防失联联系方式**在电脑端打开链接  
<http://www.docsriver.com/shop.php?id=3665>



包慎伯先生年譜序

有有用之學有無用之學有用之學兵農禮樂是也無用之學詩文辭賦是也然古來豪傑之士其能兵農禮樂者出其餘以爲詩文辭賦無不才思奮發慷慨激昂若夫沾沾以詩文辭賦自喜者一語夫兵農禮樂之大則張口而無所云嗚呼此有用無用之辨也吾邑包慎伯先生豪傑士也其學問經濟卓然在人耳目卽下至一藝之微亦非世之弄筆墨者所可及韞玉幼讀先生書竊妄自期許舉凡一言一動悉以先生爲程式不屑爲俗儒咕畢之學庚子之役四方騷動韞玉時居鄉里仿戚南塘遺意舉練鄉兵乃事未舉而嘗嘗者之口卽隨於後癸卯出遊念民食之維艱見荒地之未闢慨然有明農

之意適無湖之萬頃湖舉事伊始遊說舊友舉地四千畝資界開闢  
爲之悉力經營思欲於此先植根基然後大展其志經界甫正洪水  
爲災乃復決然舍去營營無所表見夫先生雖屢招挫折然不用其  
身而能用其言每於立譚之頃出百萬生靈於水火之中而登之衽  
席繼玉十餘年來小試輒敗一事無成賢文爲生依然俗儒故態然  
後歎才力不及之甚也邇來端居多暇將先生一生行事以及學術  
文章凡有年可紀者編爲年譜乃復刺取其卓卓者別爲傳以冠其  
首嗚呼先生非一縣之人實天下之人非一世之人實萬世之人也  
全書具在世之爲有用之學者皆當奉爲圭臬而無俟夫年譜之編  
輯特後人之崇拜先哲也驚其磊落奇偉之節每苦無從摹擬及一



讀其編年之書見其學隨年進確有階級之可循則效法之心油然而生韞玉之編先生年譜也非僅寄其高山仰止景行行止之思亦借此以自勵焉爾胡韞玉自識

--	--	--	--	--	--	--	--	--	--	--

傳

包世臣字慎伯安徽涇縣人幼讀書至孟子五畝之宅章卽問今日制產何以不如此弱冠游蕪湖受知于中江書院山長程公世淳面試冰賦奇其才薦于徽甯道宋公銘值大旱命作誅旱魃文稿傳至皖江時大興朱文正公以大司馬撫皖見其文異之詢宋公知出先生手召至門下以賈生相期許先生于書無所不讀而尤究心于當世之務名動公卿當時主試江南者皆以不得先生爲恨六赴秋闈乃一遇其座主陳周兩侍郎入都都中無不以得先生爲賀至宮門成邸卽拜手賀曰二公真不愧爲國求賢江南有千里駒朱師傅林養之十餘年無能市者二公竟一網得珊瑚矣然坐此摧排之者亦

衆十三次赴春官竟不遇每禮部揭曉時輒聞榜下人云安徽包君  
被放登第人可想吾輩亦足自豪桐城姚柬之代爲不平嘗詢貢院  
司事者皆言得先生卷發賸不送內簾事後乃加房戡于敗卷以是  
十餘試訖無一遇先生雖不得志于有司而救世之心愈切游楚蜀  
江浙燕齊魯豫所至之處博訪周諮遇宿士方聞質疑求是遇樵夫  
漁師舟子與人罪隸退卒邂逅之間亦必導之使言是者識之否者  
置之于是悉知水陸之險易物力之費耗官場之情僞窮慘之疾苦  
先生既不能自達其道所至與當途論說嘉慶戊午冬遊楚北爲浦  
城祖承宣畫招流亡開屯田營戰屯守之策具牘于督師被格他人  
得其稿者則潤爲堅壁清野議得上達卒以之蕩平教匪戊辰遊袁

浦覺羅長文敏公大庾戴文端公聞聲下交立談之間以罷徐揚六  
府州攤徵三百六十萬已成之議辛未秋佐百文敏公治河臨工決  
蓋壩之策旬日間使袁浦板閘淮安百萬家得免爲魚丙寅夏在揚  
州誘伊太守舉荒政全流民三萬甲戌冬在白門激百文敏公舉荒  
政活飢黎八萬凡此皆先生之卓卓有功于民者晚年試令江西年  
餘被劾歸隱雞籠山麓以賣文自給余既編輯先生年譜成乃刺取  
其大者作爲此傳以冠其首

論曰先生出遊日久有名于公卿間及至晚年依然儒業此古人之  
最不可及處今之所謂士者侈口談當世務乃不轉瞬而囊橐充裕  
焉宜乎惠之及于民者鮮也世之學先生者毋學其才當學其守於

今之世庶有豸乎

包慎伯先生年譜

邑後學 胡繩玉輯

乾隆四十年乙未先生年一歲

吾溼生於乙未者四人吳敬恆字愛庭翰林胡世琦字玉樵翰

林吳鸞字鳳白進士

四十一年丙申先生年二歲

四十二年丁酉先生年三歲

四十三年戊戌先生年四歲

四十四年己亥先生年五歲

是年先生始讀書按安吳四種總目敘曰乾隆己亥先君子抱

世臣於職上授以句讀

四十五年庚子先生年六歲

四十六年辛巳先生年七歲

先生從郡學公讀書受孟子先生問曰今天下內外官吏皆以讀書起科第皆讀孟子何不遵行其道而使貧富相耀宗族渙散耶兒異日若得一命以上持此以出其可乎郡學公曰兒什相非貧賤者然推此意其必不容於流俗已然兒慎保初心毋爲習俗所染况事變不常非一人聰明材力所能備兒其慎之遂字先生曰慎伯先生資質絕人讀書能得闡讀大學中庸卽疑曾子述夫子之言門人記曾子之意文勢何以與孝經論語



邇殊又子思道傳孟子孟子晚而著書後中庸甚遠而孟子愷切激昂不似中庸平衍此等見解得之幼年可謂天授是年始學爲文

四十七年壬寅先生年八歲

是年從郡學公讀書白門爲八比六韻

四十八年癸卯先生年九歲

是年仍讀書白門

四十九年甲辰先生年十歲

是年仍讀書白門嗜嘉魚文

五十年乙巳先生年十一歲

包慎伯先生年譜

二  
學

是年仍讀齊白門編選詩好之

五十一年丙午先生年十二歲

正月先生隨郡學公謁青山寺祖墓出烏江遇大雪主張童子家五日童子名楚姓張和州之烏江人其祖年七十餘繕於新王廟而生童子故名曰楚童子幼聰慧六歲就外傳日記數十字因同學有讀爾雅者童子請於師亦授讀焉童子與先生同年月日而稚四時甚相愛先生見其室有故籍百餘卷繙閱始遍童子曰讀書泛濫無益吾日讀二千字三遍即可倍五遍大熟然至愜意者暇隙諷誦常至數千遍必使自明其義注解多不可靠也先生嘆絕謂之曰吾子精熟經史何以尙不學作詩

文童子曰學在內者也文在外者也俟弱冠內學尤而後學文  
豈爲遲乎雪巒相別次年童子殤於痘是年先生仍讀書白門

五十二年丁未先生年十三歲

讀書白門見調駐防赴台灣慨然有志於權家求其書於市并  
得法家言兼治之

五十三年戊申先生年十四歲

讀書白門誦選賦好之

五十四年己酉先生年十五歲

先生侍郡學公至郡應科試始識翟儀仲儀仲名宦涇縣人善  
詩與郡學公善是年先生從族曾祖包植之先生槐間執筆之

法試能仍讀書白門得孫吳司馬三家之書朝夕研究講求兵  
學

五十五年庚戌先生年十六歲

是年讀書白門

五十六年辛亥先生年十七歲

是年讀書白門

五十七年壬子先生年十八歲

是年讀書白門卽罷帖括之業見書賈新雕日知錄出版先生  
繕閱首冊極愛其書力不能購先生父郡學公病痔歸里無生  
計先生租屋旁地十畝藝蔬果鬻於市以給餽粥藥湯因究農

家利病

五十八年癸丑先生年十九歲

是年先生集童子十三人於植塘董氏教之植塘去先生家十五里時郡學公病甚先生每晚飯後以館餐可以苞苴者攜歸省視五鼓回館治早課以爲常一日先生求藥物於水東過翟儀仲墓作詩云忽忽過荒墓長懷翟秀才神期乍譚笑文采竟滿萊寒谷泉空咽衰楊葉自摧誰憐霜草宿蕭颯北風來先生返爲郡學君言儀仲墓荒涼狀並誦詩郡學君噓唏不自勝久之問曰兒詩大似儀仲何以能此先生對曰自八九歲侍几席常課畢輒自讀文選嗣大人從戴氏假得全唐詩私繕閱之常

撤夜心有所觸輒效爲之稿累五六百首大人病不敢以請郡  
學君曰吾事詩晚又苦腹儉不足稱其意兒能終吾業者異日  
當以此致大名是年先生作兩淵十六篇五千餘言又論古兵  
事得失亦五千餘言以知兵名于時先是丁未先生讀書白門  
見調駐防赴台灣官軍號哭無人色乃慨然有志于兵求得孫  
吳司馬三家之書日夕講求後讀荀子議兵篇愈信孔子所謂  
我戰則克者切于司馬正于孫而大于吳矣嗣又求得許氏虎  
鈴經唐氏武篇茅氏百將傳武備志戚氏練兵實紀紀效新書  
鄭氏籌海圖編王氏登壇必究李氏金湯借箸十二籌袁氏泝  
游百金方先生以其書大都雷同陳述又其術雜怪惑惟戚氏

差勝然見小不足窺大勇之門戶乃探索左氏春秋國語戰國策越絕書史記漢書三國志所載戰事以參伍荀子孫吳司馬之說爲兩淵

五十九年甲寅先生年二十歲

是年郡學公棄世先生家居

六十年乙卯先生年二十一歲

是年先生家居

嘉慶元年丙辰先生年二十二歲

是年先生服闋夏遊蕪湖受知於中江講院侍御程公世淳而試冰賦奇其才薦于徽甯道宋公鎔

二年丁巳先生年二十三歲

是年夏苦旱禱祈屢至卒不雨宋公請先生作誅旱魃文文稱於時稿達於皖江時大興朱文正公撫院見其文嘆曰此奇才也訪知出先生手乃手詔先生秋先生至院謁文正公於節署文正喟然曰楚豫匪勢猖獗糜爛人民安徽西接黃州北邊固始勢若處堂吾子亦有萬全之策可近護桑梓而遠戢妖氛乎先生對曰爲政之道先戒爲寶蒙宰戒之矣現今之勢不強民而令不擾民而強者莫若練鄉兵文正曰今勢極苦無食支銷不能捐募莫應鄉兵之練費將焉出先生曰川楚初招鄉勇人日給錢二百摧鋒有績世臣則竊笑之卒有新野竹谿之役者



勢使然也今仿行其法卽多募義急公之士捐餉十萬招集無  
賴散處鄉邑世臣恐練之未成而安徽已亂也行世臣之法匝  
月間費不及三十萬可得勝兵五十萬文正曰甚哉子之說之  
奇而震人也果鑿鑿可行老夫願從爾後也先生曰不知而言  
不智知而不言不忠不智不忠世臣所不敢出且邱墓之邦冢  
宰之棟棟之隆世臣所庇也因對鄉兵之策甚悉文正曰善吾  
子老其才充其氣以儲大用洛陽少年不足多矣子爲我詳議  
其策先生乃爲練鄉兵對二千餘言上之明日文正召先生謂  
曰斯事體大同官意見不諧非吾所能辦也皖境江面五百里  
水盜縱橫或言楚北停運水手滋擾或言安陸漢陽告急匪勢

甚熾意欲遠東此其嚆矢舟而概賈剽掠及身野渡村漁斗米斤鹽皆見攘奪兵弁巡江曾未遠城裂檄碎舟日常數輩斯事甚急子爲我策之先生對曰楚運停已三載爲盜不俟今日匪果欲東勢可直下亦斷無小劫之理此不過安漢難民偷喘殘生耳以世臣之策不過旬日間可不誅一人而江賊自盡且收爲利今安徽憂賊東下共捐銀五萬兩議招水軍而未決今江賊皆楚人長於舟楫且其爲盜劫是爲亂所驅今誠設重募于各口招應水軍彼前得安生後遠死法其從令不待讀檄之畢懷以恩撫而用之信於常兵與招疍丐不習水者功利相倍文正曰若然安徽無戰艦一樓船費五六千兩造之則費無出奈

何先生曰今以意創分水龍百艘艘不過銀百五十兩耳船底尖兩頭銳置較貫船外夾以輪舟中發輪以足踏輪撥水行其速如飛上蓋牛皮以禦砲矢得此截江勝于樓船文正曰善先生曰招安三數千人五萬之餉僅支七八月耳文正曰然則何如先生曰八卦門外有新洲闊三里長十里因而成田可得田萬五十畝畫而爲區人給一區優給牛種督令出屯成熟時十分取二貯公以備潦歲給餉陸續製備軍裝一收之後人有恆產各懷其居則善建不者者矣文正曰善問日文正語宋兵備銘曰包生真奇才其言應變而不窮確無飾說然老夫且夕且去此未能用也宋公退謂先生曰子說又不行矣然江賊吾責

也爲吾思其次先生曰惟有驅之而已宋公曰驅之奈何先生曰賊船皆楚中雙飛燕易辨船小而容人不多且亦無銜尾聯樞至數十艘者大羣才三四十人耳舟小不耐風浪難挂江宿宜飭本屬移書臬司轉飭江北州縣一體捐廉添捕移營勅兵協防但守港口不出巡江疊示張掛港口凡雙飛燕來不許入港彼無地覓宿必東下吳若江蘇仿此行之將窺而入海耳庶幾下策之得也宋公從之不及半月舟行者俱無患冬江西熊尙書枚時承宣安徽聞聲相求次日先生走答熊公令孫錞出見時十歲眉目如畫載梁帽衣紫布袍紅青布套銀項圈倚肩出熊公曰先生試使之背周禮先生卽抽問五六事而環環背

誦先生起賀後鐫成進士官至廣西布政使是歲先生客文正節署始見十三經注疏盡九月之力讀之一過

三年戊午先生年二十四歲

十月先生應陳祭酒之招至湖北傅臥雲言先生知兵事有奇略于湖北布政使祖之望祖公訪先生先生答拜祖公延至密室屏侍者而告曰自嘉慶紀年兵興楚北最爲糜爛奸民伏莽隨處皆在與秦蜀接壤之處深嚴密壑袤延千里節節立卡合計兵勇尙五六萬人從前招聚鄉勇節次裁散數不下二十餘萬裁散之勇無業可歸流徙攘竊在在可虞藩庫現存款不過五十萬連扣存報銷軍需部費十七八萬尙不足七十萬此間

名爲省垣存兵不過數百人勢同火上厝薪焚如立至先生亦有奇策可以保護疆域乎先生對曰智者常因敗以立功豈止少安而已乎今春二麥熟漢口存糧不下二十萬石鐵行十三家鐵匠五千餘名又蘇商之所聚庫內存扣銀兩介公私之間是可動用閣下再作札致蘇商使截蘇商之課十數萬合銀三十萬兩以十萬兩買兩麥以三萬兩買鐵行之鐵晝夜趕造農器數十萬事約工價五萬一面通飭各州縣出示招散勇之流亡者要爲資送前赴襄郢一面派妥前往度地勢插屯每人給地二三十畝農器二三具籽種口糧若干漫撒麥種其地已荒二年收成必倍一麥之後人各擁穀數十石已有固志官運其半

赴漢口轉賣爲置牛具秋後酌收五分之一就近接濟防兵口  
食卽在各兵名下糧餉內扣收以歸原款楚行有效秦蜀必相  
繼仿行各營力足自守則兵可專意剿辦賊內不能耕外無可  
掠然後開以生路勦撫兼施芒盡霧消可翹足而待也祖公曰  
善先生爲條具六事上之兩湖總督景伯景伯以示襄陽知府  
知府聞之曰楚北兵興三載動用錢糧六十萬將來不能報銷  
者約十之五故指此產以爲彌補今招集無賴以興屯田其成  
否既不可知而報銷望礙恐大府將受無窮之累也景伯以爲  
然遂駁其牘是歲先生客武昌與錢東湖先生相唱和東湖錢  
文敏公猶子善詩先生入楚途步斷壁頽垣損心悼目之象一

寓于詩未嘗以草稿示人及見東湖乃出以相質東湖亦以已  
作示先生

四年己未先生年二十五歲

夏明文毅公任川楚左參贊聘先生入蜀治戎事行三日至七

里卡聞變道梗卡有七摩伊

熟習  
如陳

各領兵勇一萬先生欲揀兵

一千以行明公以爲少先生謂精揀則一可當十明公曰經略

來促甚急揀兵非十日不可姑以二千行耳先生曰公能聽所

用明日食時爲公集之明公笑曰吾子毋太易事先生曰公能

從而事不集者有軍法明公曰何至出此言吾子姑行之耳先

生乃撤甲喇大

喇大  
其長

移會各摩伊每哨備六尺竹竿二根三百



勛石二塊明早伺于教場而別告營伍處

略如巡捕而  
非權較重

會各摩

伊營伍處各備五尺六寸竹竿二根二百四十勛石二塊以俟

令明早明公率七摩伊至教場為先生設帳于將臺少東遂下

令曰植六尺竹竿量兵勇身材中度者上將臺試舉三百勛石

其長不中度而力能舉三百勛石者自赴將臺報名候試未及

午而揀舉得八百人其長不及度者才二十之一明公回帳迎

拜曰不知吾子神機如此老夫經兵事四十年未嘗見也但不

及千人奈何先生曰八百人者恐摩伊未必肯放耳揀出精勇

餘皆羸弱七摩伊如夢初醒必不聽行也語次七摩伊上謁長

跪求留所練兵明公曰吾友已言及此諸公同吾友商之先生